

## Evening Dogri (NSD)

27-10-2025

### खबरां

1. भारती चुनांऽ आयोग आसेआ 12 राज्यें ते केन्द्र शासित प्रदेशें च मतदाता सूचिएं दी बशेश नजरसानी करोआने दी घोषणा कीती गई ऐ।
2. गृह मंत्री अमित शाह होरें आखेआ ऐ जे भारत अपनी रणनीतिक समुंदरी स्थिति, लोकतांत्रिक स्थिरता ते मजबूत नौसैनिक समर्थ दे कारण हिंद-प्रशांत खेतर ते ग्लोबल साउथ मझाटै इक महत्वपूर्ण पुल दी भूमिका निभा करदा ऐ।
3. रक्षा मंत्री राजनाथ सिंह होरें आखेआ ऐ जे देश दे रक्षा विनिर्माण च निजी खेतर दी भागीदारी बधा'रदी ऐ। उ'नें आखेआ जे भारत दा रक्षा निर्यात हुन रिकॉर्ड 23 हजार 500 करोड़ रुपें तगर पुज्जी गेआ ऐ।
4. सर्वोच्च अदालतै अज्ज सबनें राज्यें ते केन्द्र शासित प्रदेशें गी नोटिस जारी करियै डिजिटल अरेस्ट कन्नै जुड़े दे धोखाधड़ी दे मामलें पर उ'दे आसेआ दर्ज कीते गेदे एफ.आई.आर. दा ब्यौरा मंगेआ ऐ।
5. चक्रवाती तूफान मोन्था, बंगाल दी खाड़ी च चेन्नई थमां 600 किलोमीटर दक्खण-पूर्व च ऐ। आंध्र प्रदेश, ओडीशा ते तमिलनाडु नै कल एह्दे असर दा मुकाबला करने लेई कमर कस्सी लैती ऐ।

<><><><><><>

### EC-SIR

निर्वाचन आयोग नै अज्ज घोषणा कीती ऐ जे दुए चरण च 12 राज्यें ते केन्द्र शासित प्रदेशें च मतदाता सूचियें दी विशेष नजरसानी कीती जाग। मुख निर्वाचन आयुक्त ज्ञानेश कुमार होरें अज्ज नमी दिल्ली च मीडिया कन्नै गल्लबात च आखेआ जे विशेष नजरसानी दा मसदक मतदाता सूचियें गी मता पारदर्शी ते त्रुटिरैहत बनाना ऐ। उनें आखेआ जे दुए चरण च एस.आई.आर. चरणबद्ध तरीके कन्नै कीता जाग। मुख निर्वाचन आयुक्त होरें दस्सेआ जे विशेष नजरसानी दे पेहले चरण च चुनांऽ निकाय गी कोई अपील हासल नेई होई ऐ। मुख्य निर्वाचन आयुक्त होरें घोषणा कीती जे जिनें 12 राज्यें ते केन्द्र शासित प्रदेशें च एस.आई.आर. कीता जाह्ग, उत्थे मतदाता सूचियां अज्ज अही राती थमां फ्रीज करी दित्तियां जाडन। उनें

गलाया जे इनें राज्यें ते केंद्र शासित प्रदेशें च बूथ स्तर दे अधिकारी - (बीएलओ) मौजूदा मतदाताएं गी विशिष्ट गणना प्रपत्र वितरित करडन। ज्ञानेश कुमार होरें गलाया जे जिनें मतदाताएं दे नांऽ 2003 दी मतदाता सूची च ऐ हे, उ'नेंगी कोई अतिरिक्त दस्तावेज देने दी लोड नेई ऐ। उनें आखेआ जे जिनें मतदाताएं दे नांऽ 2003 दी मतदाता सूची च नेई ऐन, पर उन्दे मां-पेयो दे नांऽ उस सूची च शामिल ते ते उ'नेंगी बी बादू दस्तावेज जमा कराने दी कोई लोड नेई होगा।

<><><><><><>

### HM IWM

गृह ते सहकारिता मंत्री अमित शाह होरें आखेआ ऐ जे भारत दा समुंदरी दृष्टिकोण सुरक्षा, स्थिरता ते आत्मनिर्भरता पर आधारित ऐ। श्री शाह होरें अज्ज मुंबई च भारती समुंदरी सप्ताह दे उद्घाटन कार्यक्रम च एहू गल्ल आखी। उ'नें आखेआ जे हाल दे ब'रें च कीते गेदे व्यापक ढांचागत सुधारें राहें भारत इक मजबूत समुंदरी शक्ति दे रूप च सामने आया ऐ। निवेशकें लेई भारत दी समुंदरी समर्थ पर श्री शाह होरें आखेआ जे देशै च साड्डे 7 ज्हार किलोमीटर लम्बी समुंदरी तट रेखा, समुंदरी कंडू आहले 13 राज्य ते केंद्र शासित प्रदेश न ते कन्नै 23 लख 70 ज्हार वर्ग किलोमीटर दा इक बशेश आर्थिक खेत्तर बी ऐ। उ'नें आखेआ जे भारत अपनी रणनीतिक समुंदरी स्थिति, लोकतांत्रिक स्थिरता ते मजबूत नौसैनिक क्षमताएं दे कारण हिंद-प्रशांत खेत्तर ते ग्लोबल साउथ मझाटै इक महत्वपूर्ण पुल दा कम्म करदा ऐ। इस मौके उपपर बंदरगाहें, जहाजरानी ते जलमार्गे सरबन्धी मंत्री सर्बानंद सोनोवाल होरें आखेआ ऐ जे भारत समुंदरी सप्ताह दुनिया दे सबनें शा प्रमुख समुंदरी समारोहें चा इक बनी गेआ ऐ। एह्दे च 85 मुल्लें, 500 शा मते प्रदर्शकें ते 40 मंचें दी भागीदारी होआ'रदी ऐ। उ'नें आखेआ जे इस आयोजन दा विशे - महासागरें दा एकीकरण, इक समुंदरी दूनजरिये - वसुधैव कुटुम्बकम् दी भावना गी दर्शादा ऐ। श्री सोनोवाल होरें आखेआ जे समुंदरी खेत्तर, विकसित भारत दे सबनें शा मजबूत थम्में चा इक दे रूप च उभरा करदा ऐ। महाराष्ट्र दे मुखमन्त्री देवेंद्र फडनवीस होरें आखेआ जे वधावन बंदरगाह गी भारत दे सबनें शा बड्डे ते दुनिया दे अव्वल दर्जे दे 10 बंदरगाहें चा इक दे रूप च विकसित कीता जाह्गा। उ'नें तेज़ी कन्नै विकसित होआ करदे मजबूत जहाज निर्माण तंत्र च रास-पूँजी दिएं संभावनाएं पर बी ज़ोर दित्ता। उद्घाटन समारोह च गुजरात दे मुखमन्त्री भूपेन्द्र पटेल, गोवा दे मुखमन्त्री डॉ. प्रमोद सावंत, ओडिशा दे मुखमन्त्री मोहन चरण माझी ते केन्द्री राज्य मंत्री शांतनु ठाकुर बी मजूद हे।

## Home-Minister Majhgav

गृह मंत्री अमित शाह होरें आखेआ ऐ जे सरकार नै अगले 5 बरें च देश भरै च सहकारी आधार पर गहरे समुंद्र च मच्छियां फगड़ने आहले करीब 200 बड़े जहाज वितरित करने दी योजना बनाई ऐ। ओहू अज्ज मुम्बई मझगांव बंदरगाह पर प्रधानमंत्री मत्स्य संपदा योजना दे तैहत गैहरे समुंद्र च मच्छियां फगड़ने आहले दो जहाज वितरित करने ते लाभार्थियों गी जहाज पंजीकरण प्रमाण पत्र ते प्रतीक दे तौर पर जहाजें दी चाबियां देने दे बाद गृहमंत्री होर इक सभा गी संबोधित करा'रदे हे। उनें एहू बी आखेआ जे सरकार दा मकसद भारत दे मत्स्य उद्योग गी मजबूत करने ते मछुआरें तगर लाहू पजाने आस्तै समुंद्री उत्पादें दे संग्रह, प्रसंस्करण ते निर्यात गी सुविधाजनक बनाने आस्तै इक व्यापक योजना शुरू करना ऐ।

<><><><><><>

## EAM – PM NZL

बदेश मंत्री डॉक्टर सुब्रह्मण्यम जयशंकर होरें अज्ज कुआलालंपुर च आसियान बैठक थमां बक्ख-बाहें न्यूज़ीलैंड दे प्रधानमंत्री क्रिस्टोफर लक्सन हुं'दे कन्नै मलाटी कीती। डॉक्टर जयशंकर होरें उ'नेंगी प्रधानमंत्री नरेन्द्र मोदी हुं'दी तरफा बधाई दित्ती। उ'नें दपक्खी सैह्योग गी अगगे बधाने ते इक सुतैतर ते खुले हिंद-प्रशांत खेत्तर गी विकसित करने लेई श्री लक्सन हुं'दी प्रतिबद्धता दा सुआगत कीता। बदेश मंत्री होरें अज्ज बडुलै अमरीका दे बदेश मंत्री मार्को रुबियो हुं'दे कन्नै बी मलाटी कीती। उ'नें दपक्खी सरबंधें दे कन्नो-कन्नो इलाकाई ते वैश्विक मुद्दें पर बी चर्चा कीती। डॉ. जयशंकर होरें मलेशिया दे बदेशमंत्री मोहम्मद हाजी हसन हुं'दे कन्नै बी मलाटी कीती। सोशल मीडिया दी इक पोस्ट च बदेश मंत्री होरें आखेआ जे उं'दी चर्चा दौनें देशें बश्कार दपक्खी सैह्योग च प्रगति पर केंद्रित रेही। बैठक दे दरान दौनें नेताएं म्यांमा दी स्थिति पर बी बचार-बटांदरा कीता। बदेश मंत्री होरें आसियान ते पूर्वी एशिया शिखर सम्मेलनं दी कामयाबी लेई बी उ'नेंगी अपनियां शुभकामनां दित्तिआं।

<><><><><><>

## Rajnath

रक्षा मंत्री राजनाथ सिंह होरें आखेआ ऐ जे देशै दे रक्षा विनिर्माण च निजी खेत्तर दी भागीदारी बधा'रदी ऐ। श्री सिंह होरें आखेआ जे भारत दा रक्षा निर्यात हुन रिकॉर्ड 23 हजार 500 करोड़ रुपें तगर पुज्जी गोआ ऐ। नमीं दिल्ली च एसआईडीएम दे सलाना सम्मेलन गी संबोधित करदे होई श्री सिंह होरें आखेआ जे पिच्छले इक दहाके च देशै दा घरेलू रक्षा उत्पादन बधियै रिकॉर्ड डेढ़ लक्ख करोड़ रुपें शा मता होई गोआ ऐ ते एह्दे च निजी खेत्तर दा 33 ज्हार करोड़ रुपें शा मते दा जोगदान ऐ। ऑपरेशन सिंदूर दी कामयाबी दी सराहना करदे होई रक्षा मंत्री होरें नमिणं काह्डें, डिज़ाइन ते विनिर्माण दे मोर्चे पर अनथक जतनें लेई उद्योग जगत दी सराहना कीती। श्री सिंह होरें दस्सेआ जे कि'आं आकाश मिसाइल प्रणाली, ब्रह्मोस, आकाशतीर वायु रक्षा नियंत्रण प्रणाली ते केई होरनें स्वदेशी उपकरणें ते प्लेटफार्मे ऑपरेशन सिंदूर दे दरान अपनी समर्थ दस्सी। उ'नें आखेआ जे देशै दे स्वदेशी उपकरणें इलाकाई स्तर पर गै नेई, सगुआं अंतर्राष्ट्री स्तर पर बी भारत दी प्रतिष्ठा बधाने दा कम्म कीता ऐ। रक्षा मंत्री होरें आखेआ जे सरकार घरेलू विक्रेताएं गी बढ़ावा देने दे जतन करा'रदी ऐ। उ'नें आखेआ जे प्लेटफार्मे, प्रणालियें ते उप-प्रणालियें गी बल्लें-बल्लें स्वदेशी बनाना चाहिदा ऐ। उ'नें ओकड़ी चीजें लेई घट्टोघट्ट 50 फीसद स्वदेशी समग्री दे प्रावधान पर बी लोड पाई जेहिडियां देशै च नेई बनी सकदिआं न।

<><><><><><>

## VP Seychelles Prez

उपराश्ट्रपति सी.पी. राधाकृष्णन होरें अज्ज स्टेट हाउस च सेशेल्स दे नमें निर्वाचित उपराश्ट्रपति सेबेस्टियन पिल्लै हुं'दे कन्नै मलाटी कीती। श्री राधाकृष्णन होरें सोशल मीडिया पर इक पोस्ट च आखेआ जे इस दरान भारत-सेशेल्स दे सांझी विरासत, संस्कृति ते लोकें दे आपसी तालमेल पर आधारित बहुआयामी सरबंधें पर चर्चा होई। उपराश्ट्रपति होरें श्री पिल्लै होरें'गी उं'दे सफल कार्यकाल लेई शुभकामनां दित्तिआं।

<><><><><><>

## PM Article

प्रधानमंत्री नरेन्द्र मोदी होरें केंद्री मंत्री भूपेंद्र यादव हुं'दे आसेआ लिक्खे गेदे ओकड़े लेख गी सांझा कीता ऐ जेह्दे च आखेआ गेआ ऐ जे जलवायु दी रक्षा भारत दी नैतिक जिम्मेदारी ऐ ते एहू वैश्विक जलवायु कार्रवाई दा केंद्रबिंदु बी ऐ। प्रधानमंत्री होरें सोशल मीडिया पोस्ट च निरपक्ख, अनुदान-आधारत जलवायु वित्त दी जरूरतै उप्पर लोऽ पाई, जेह्ड़ा ऐतिहासिक जिम्मेदारियें गी मान्यता दिं'दा होऐ ते विकासशील मुल्खें गी इक बरोबर रूप कन्नै समर्थन प्रदान करदा होऐ।

<><><><><><>

## America-Navy

अमरीका दी नौसेना नै आखेआ ऐ जे कल नियमित अभियान दरान इक हेलीकॉप्टर ते इक लड़ाकू जहाज दक्खन चीन सागर च इक घंटे दे अंतराल च बक्ख-बक्ख दुर्घटनाग्रस्त होई गए न। अमरीकी प्रशांत बेड़े नै इक सोशल मीडिया पोस्ट च आखेआ जे इन्दे च शामिल सब्बै कर्मचारी सुरक्षित नं दौनें दुर्घटनाएं दे कारणें दी जांच कीती जा'रदी ऐ। एहू घटनां उस बेल्लै होइयां जदूं राष्ट्रपति डॉनल्ड ट्रम्प एशिया दी यात्रा पर हे। अज्ज एयर फोस वन च संवाददाताएं कन्नै ट्रम्प होरें आखेआ जे एहू दुर्घटनां असमान्य हियां ते एह्दा कारण खराब ईंधन होई सकदा ऐ।

<><><><><><>

## HM-Moaists

गृह मंत्री अमित शाह होरें दस्सेआ ऐ जे छत्तीसगढ़ दे कांकेर ज़िले च 21 नक्सलियें अपने थेआरें सने आत्मसमर्पण करी दित्ता ऐ। सोशल मीडिया पोस्ट च शाह होरें आखेआ जे 21 नक्सलियें चा 13 बड्डे कार्यकर्ता हे। 31 मार्च 2026 तगर नक्सलवाद दे उन्मूलन दे अपने संकल्प गी दोहरांदे होई उनें होर नक्सलियें गी तौले थमां तौले आत्मसमर्पण करने दी अपील कीती।

<><><><><><>

## ISRO

भारतीय अंतरिक्ष अनुसंधान संगठन - इसरो ने एलवीएम-3 प्रक्षेपण यान गी श्रीहरिकोटा स्थित सतीश धवन अंतरिक्ष केंद्र च प्रक्षेपण आहली जगह पर पजाई दित्ता ऐ। प्रक्षेपण यान गी 2 नवंबर गी प्रक्षेपित कीते जाने आहले सी.एम.एस-03 संचार उपग्रह दे कन्नै संयोजित ते एकीकृत करी दित्ता गेआ ऐ। मार्क-3 प्रक्षेपण यान दी 5मीं परिचालन उड़ान देश दे सभने भारी चार ज्हार 400 किलोग्राम दे संचार उपग्रह गी भू-समकालिक कक्षा च स्थापित करग। सीएमएस-03 बहु-बैंड संचार उपग्रह भारतीय भूभाग दे नजदीकी समुद्री क्षेत्र च संचार सेवाएं गी बदाग ते दूर-दरेडे इलाकें तोड़ी डिजिटल पुज्ज दा विस्तार कीता जाग।

<><><><><><>

## SC Digital Arrest Scam

सर्वोच्च अदालतै अज्ज सबनें राज्यें ते केंद्र शासत प्रदेशें गी नोटिस जारी करियै डिजिटल अरेस्ट कन्नै जुडे दे धोखाधड़ी दे मामलें पर उं'दे आसेआ दर्ज कीते गेदे एफ.आई.आर. दा ब्यौरा मंगेआ ऐ। अदालतै देशै च बधदी डिजिटल अरेस्ट दिएं घटनाएं गी दिक्खदे होई सबनें मामलें दी जांच केंद्रीय जांच ब्यूरो-सीबीआई गी सौंपने पर बी बचार कीता ऐ। सुप्रीम कोर्ट ने सीबीआई गी पुच्छेआ ऐ जे क्या उं'दे कोल देशै च ऐसे मामलें गी सांभने लेई लोडचदे संसाधन हैन जां नेई। सर्वोच्च अदालत, देश भरै च डिजिटल अरेस्ट दे बधदे खतरे कन्नै निब्बड़ने लेई आपूं गै एहदा संज्ञान लैदे होई 17 अक्तूबर थमां इस मामले दी सुनवाई करा'रदी ही।

<><><><><><>

## Shivraj

कृषि ते किसान कल्याण मंत्री शिवराज सिंह चौहान होरें भारती कृषि अनुसंधान परिषद गी कृषि शिक्षा च सुधार आस्तै सब्बै खाली पेदे पदे गी तुरत भरने दी अपील कीती ऐ। चौहान होरें अज्ज नमीं दिल्ली च राष्ट्री कृषि छात्र सम्मेलन च एहू गल्ल आक्खी। कृषि मंत्री होरें आखेआ जे सब्बै राज्यें दे मुख्यमंत्रियें गी पत्र भेजडन ते उन्दे कृषि मंत्रियें कन्नै चर्चा करियै कृषि शिक्षा गी सुचारू बनाने ते सब्बे खाली पदे गी तौले भरने लेई आखडन। उनें गलाया जे नमी शिक्षा नीति तैह्त्त गुणवत्तापूर्ण कृषि शिक्षा च मुख्य गी बदलने दी शक्ति ऐ। इस सम्मेलन च देश भरै दे कृषि छात्रें हिस्सा लैता ते ज्हारें छात्र वर्चुअल ढंगै राएं इस सम्मेलन च जड़े।

<><><><><><>

## CM-landless People

जम्मू-कश्मीर सरकार नै अज्ज आखेआ जे केंद्र शासित प्रदेश दे हाड़ प्रभावित इलाकें च उनें लोकें गी 5 मरला जिमी उपलब्ध करोआई जाग जिंदे कोल जिमी नेई ऐ ते एह्दे लेई लोड़चदी कागजी कार्रवाई जारी ऐ। जम्मू नार्थ थमां विधायक शाम लाल शर्मा हुं'दे आसेआ विधानसभा च इस बारै पुच्छे गेदे इक सोआलै दा परता दिंदे होई मुख्मन्त्री उमर अब्दुल्ला होरें जानकारी दिक्ती जे सरकार नै हाल च आए दे हाड़ें करी प्रभावित लोकें दे पुनर्वास लेई कोई नमीं नीति तैयार नेई कीती दी ऐ पर जिने लोकें कोल जिमी नेई ऐ, उनेंगी जित्थे बी उपलब्ध होग, 5 मरला जिमी पट्टे पर दिक्ती जाग।

<><><><><><>

## Kishtwar-Airport

भारत सरकार दे सिविल हवाबाजी मंत्रालय ते भारती ब्हाई अड्डा प्राधिकरण आसेआ 5 मिम्बरी उच्ची सतह दी बशेष टीम उड़ान स्कीम तैहत किश्तवाड़ च ब्हाई अड्डा विकसित करने बारै प्रस्ताव दी स्थिति दा जायजा लैने लेई कल किश्तवाड़ पुज्जग। दिल्ली परतोने पर एह् टीम अपनी रिपोर्ट आला अधिकारिएं गी सौंपोग जेह्दे मगरा अग्गे दी रूप-रेखा तय कीती जाह्ग। इक सोशल मीडिया पोस्ट पर इस बारै जानकारी सांझी करदे होई केंद्री मंत्री डॉ. जितेंद्र सिंह होरें आखेआ जे एह् प्रधानमंत्री नरेंद्र मोदी हुं'दा दूर-दरेडे इलाकें पर बशेष ध्यान देने दा गै नतीजा ऐ जे नेह् इलाकें दे विकास लेई स्हाढे हर इक अनुरोध ते पैहलकदमियें गी म्हेशां सकारात्मक प्रतिक्रिया थ्होई ऐ।

<><><><><><>

## Brigadier Rajinder

जम्मू-कश्मीर दे उपराज्यपाल मनोज सिन्हा होरें अज्ज कश्मीर दे रक्षक खोआने आहले शहीद ब्रिगेडियर राजिन्दर सिंह होरें गी उं'दी बरसी दे मौके पर शरदांजलि भेंट कीती जि'नें 1947 च पाकिस्तान आसेया कीते गेदे हमले दौरान देसै दियें सीमाएं दी राखी करदे होई अपनी जिंदू दा बलिदान देई दिक्ता हा। बक्ख-बक्ख लीडर ते आम लोक बी उं'दी पुन्य तिथि दे मौके पर उं'दी दलेरी ते त्याग गी चेता करदे होई उनें'गी भावे-भरोची शरदांजलि भेंट करै करदे न। तोंआई अज्ज गै 79में शौर्य दिवस जिसी पैहले इन्फैन्ट्री-डे आखेया जंदा हा दे मौके पर लोक 1947 च पाकिस्तानी फौज दी अगुआई च कश्मीर पर कीते गेदे हमले गी नाकाम बनांदे होई अपनी जिंदू दा बलिदान देने आहलें शहीदें गी चेता करदे होई शरदांजली भेंट कीती जा'रदी ऐ।

## Cyclone-Montha

चक्रवाती तूफ़ान मोन्था, बंगाल की खाड़ी च चेन्नई थमां 600 किलोमीटर पूर्व-दक्खण-पूर्व च स्थित ऐ। भारती राष्ट्रीय महासागर सूचना सेवा केंद्र दी खबरें मुजब एहदे अगले 12 घंटे दरान बंगाल की खाड़ी दे दक्खण-पच्छिम ते औहदे कन्नै सटे दे पच्छिम-मध्य हिस्सें च पच्छिम-उत्तर-पच्छिम आहली बक्खी अगगे बदने दी मेद ऐ। एह कल्लै तगर इक्क भीषण चक्रवाती तूफ़ान च बदली जाग। मल्लुआरें गी बुधवार तगर समुद्र च जाने दी सलाह दिती गई ऐ।

<><><><><><>